

摘藻堂四庫全書薈要

史部

欽定四庫全書薈要

史部

通志卷八十五下



詳校官員外郎臣楊世綸

欽定四庫全書薈要卷八千九百九十一

史部

通志卷八十五下

宋右廸功郎鄭樵漁仲撰

京室傳第八下

後周

邵惠公顥

顥子什肥

什肥子胄

什肥弟導

導子廣

廣子洽

廣弟翼

翼弟衆

導弟護

叱

杞簡公連

子元寶

元寶繼

莒莊

羅協

馮遷

子亮

亮弟椿

公洛生

子菩薩

賓

貢

虞國公仲

子興

興子洛廣川

通志

公測

弟深子孝伯

深

東平公神舉

父顯和

神舉弟慶

子同

靜亂

靜亂子

協

協弟白

文帝十王

宋獻公震

繼子實

衛刺王直

齊煬王憲

子貴

趙僭王

招譙孝王儉

陳惑王純

趙野王盛

代燾

王達冀康公通

滕聞王適

孝閔一王

紀厲王康

明帝三王

畢刺史王賢 鄆王貞

孝武六王

漢王贊

餘五王同贊
為隋文所誅

宣帝二王

萊王衍與郢王術同為隋文所誅

隋

蔡景王整

子積智

滕穆王瓚

子綸

道宣王嵩

衛昭王

爽子集河間王弘子慶義城公處綱弟處離石太守子

崇

文帝四王

房陵王勇子儼秦孝王俊子浩庶人秀 庶人諒

煬帝三子

元德太子昭子侑是為恭帝次齊王暕 趙王

果

後周

邵惠公顥文帝之長兄也德皇帝娶樂浪王氏是為德

皇后生顥次杞簡公連次莒莊公洛生次文帝顥性至
孝居德皇后喪哀毀過禮魏正光末沃野鎮人破六韓
拔陵作亂所署偽王衛可瓌最彊德皇帝糾合鄉曲與
可瓌戰于武當臨陣墜馬顥奔救殺數十人賊衆披靡
德皇帝乃上馬引去俄而賊追騎大至顥遂歿焉其後
德皇帝竟斬可瓌及鮮于修禮起德皇帝與諸子俱陷
其軍中為其將佐葛榮殺修禮爾朱榮平葛榮舉家方

遷晉陽周有天下保定初追贈顯大冢宰封邵國公諡
曰惠顯三子什肥導護什肥事母以孝聞文帝入關不
能離母遂留晉陽文帝定秦隴什肥為齊神武所害保
定初追贈大將軍小冢宰襲爵邵國公諡曰景子冑嗣
冑少孤頗有幹畧景公之見害以年幼下蠶室保定初
詔以晉公護子會紹景公封天和中與齊通好冑歸襲
爵邵國公及隋文帝輔政冑為滎州刺史舉兵應尉遲
迴為清河公楊素所殺國除會字乾仁冑至自齊改封

譚國公後與護同誅建德二年追復封爵常武公導字

菩薩少雄豪有仁惠初與諸父在葛榮軍中榮敗遷晉

陽與文帝隨賀拔岳入關導從而西常從征伐文帝討

侯莫陳悅以導為都督悅走故塞導追斬之牽屯山以

功封饒陽縣伯及魏文帝東征留導為華州刺史既而

趙青雀于伏德慕容思慶等作亂導擊之禽伏德斬思

慶屯渭橋會文帝軍及事平進爵章武郡公加侍中開

府及高仲密以北豫州降文帝東征復以導為大都督

行華州刺史甚得扞守之方及大軍不利東魏追至稠桑知關中有備乃還侯景來附詔徵隴右大都督獨孤信東下令導代信為秦州刺史大都督十五州諸軍事及齊氏稱帝文帝發關中兵討之魏文帝遣齊王廓鎮隴右徵導拜大將軍大都督二十三州諸軍事屯咸陽大軍還乃旋舊鎮導性寬明善於撫馭凡所引接人皆盡誠臨事謹慎常若弗及文帝每出征留導居守深為吏民所附朝廷亦以此重之魏恭帝時薨於上邽贈尚

書令謚曰孝朝議以導撫和西戎威恩顯著欲令世鎮隴右以彰厥德及薨葬於上邽城西無疆原華戎會葬者萬餘人悲號振野相率負土成墳高五十餘丈周迴八十餘步為官司所止然後泣辭而去其遺愛見思如此天和五年重贈太師柱國公導五子廣亮翼椿衆亮椿出後於杞廣字乾歸少方嚴好文學武成初位大將軍梁州總管進封蔡國公累遷秦州刺史總管十三州諸軍事性明察善於撫綏民庶畏悅之時晉公護諸子

及廣弟杞公亮等奢侈踰制廣獨率禮又折節待士朝野稱焉廣以晉公護擅權勸令挹損護不能用後除陝州總管以病免及孝公追封幽國公詔廣襲爵初廣母李氏以廣患憂而成疾遂歿廣居喪加篤乃以毀薨世稱母為廣病廣為母死慈孝之道極於一門武帝素服親臨其喪贈本官加太保隴右十四州諸軍事秦州刺史謚曰文葬於隴右子洽嗣隋文帝輔政被害國除翼字乾宜封西陽郡公早薨謚曰昭無子以杞公亮子溫

嗣後坐亮反誅國除衆字乾道少不慧封天水郡公為
隋文所誅導弟護字薩保幼方正有志度特為德皇帝
所愛文帝之入關以年少不從普泰初始自晉陽至平
涼時年十七文帝諸子並幼家務之事悉以委護內外
不嚴而肅文帝嘆曰此兒志度類我及臨夏州留護事
賀拔岳岳被害文帝至平涼以護為都督從破侯莫陳
悅後以迎魏帝功封水池縣伯從文帝禽竇泰復弘農
破沙苑戰河橋並有功芒山之役為敵人所圍賴都督

侯伏龍恩救乃免坐免官尋復本官大統十三年進封
中山公十五年遷大將軍與于謹征江陵護率輕騎為
前鋒晝夜兼攻梁臨邊城鎮並拔之進兵至江陵城下
城中不意兵至惶窘失圖大軍繼至圍而尅之師還護
又討平襄陽蠻帥向天保等萬餘落初行六官拜小司
空文帝西巡至牽屯山遇疾馳驛召護護至涇州而疾
已綿篤謂護曰吾形容若此必是不濟諸子幼小寇賊
未定天下之事屬之於汝宜勉力以成吾志護涕泣奉

行至雲陽而文帝崩護祕之至長安乃發喪時嗣子沖弱彊寇在近人情不安護綱紀內外撫循文武於是衆心乃定先是文帝嘗云我得胡力當時莫曉其指時人以護當之尋拜柱國文帝山陵畢護以天命有歸遣人諷魏帝行禪代之事孝閔踐阼拜大司馬封晉國公邑萬戶趙貴獨孤信等將謀襲護護因其入朝遂執之黨與皆伏誅拜大冢宰時司會李植軍司馬孫恒等在文帝朝久居權要見護執政恐不見容乃密要宮伯乙弗

鳳張光洛賀拔提元進等為腹心說帝曰護誅趙貴以
來威權日甚謀臣宿將爭往附之大小政事皆決於護
以臣觀之將不守臣節宜圖之帝然其言數將武士於
後園為執縛之勢護微知之出植為梁州恒為同州欲
遏其謀後帝思植等每欲召之護諫曰天下至親不過
兄弟若兄弟自構嫌隙他人何易可親但恐除臣後姦
回得逞其欲非唯不利陛下亦危社稷泣涕久之乃止
護尤猜鳳等鳳等益懼與帝密謀滋甚遂克日將除護

光洛告護護乃召柱國賀蘭祥小司馬尉遲綱等以鳳
謀告之祥等並勸廢帝時綱總領禁兵護乃遣綱入宮
召鳳等議事以次執送護第因罷散宿衛兵遣祥逼帝
幽於舊邸於是召公卿畢集護第護曰先王勤勞王業
三十餘年寇賊未平奄棄萬國寡人地則猶子親受顧
命以畧陽公既居正嫡與公等立而奉之草魏興周為
四海王自即位以來荒淫無度昵近羣小踈忌骨肉大
臣重將咸欲誅夷若此謀遂行社稷必致傾覆寡人若

死將何面目以見先王今日寧負畧陽公豈可負社稷
寧都公年德兼茂仁孝慈聖今欲廢昏立明公等以為
何如羣公咸曰此公之家事敢不唯命是聽於是斬鳳
等於門外并誅植恒等尋亦弑帝徵寧都公於岐州而
立之是為明帝二年拜太師賜輅車冕服封子至為崇
業郡公初改雍州刺史為牧以護為之并賜金石之樂
武成元年護上表歸政帝許之軍國大事尚委於護帝
性聰睿有器量護深憚之有李安者本以鼎俎得寵於

護稍被陞擢位至膳部下大夫至是護乃密令安寘毒於食以進帝遂崩護立武帝百官總已以聽於護自文帝為丞相立左右十二軍總屬相府文帝崩後皆受護處分凡所徵發非護書不行護第屯兵禁衛盛於宮闕事無巨細皆先斷後聞保定元年以護為都督中外諸軍事合五府總於天官或有希護旨者云周公德重魯立文王之廟以護功比周公宜用此禮於是詔於同州晉國第立德皇帝別廟使護祭焉三年詔自今詔誥及

百官文書並不得稱公名以彰殊禮護抗表固讓初文帝創業即與突厥和親謀為掎角共圖高氏是年遣柱國楊忠與突厥東伐破齊長城至并州而還期後年更舉南北相應齊主大懼先是護母閭氏與第四姑及諸戚屬並沒在齊皆被幽繫護每遣間使尋求莫知音息至是並許還朝且請和好四年齊人先遣護姑入關留其母以為後圖仍令人為閭氏作書與護曰吾念十八九入汝家今已八十矣凡生汝輩三男三女今目下不

見一人興言及此悲纏肌骨賴皇齊恩卹差安衰暮又得與汝楊氏姑及汝叔母紇于汝嫂劉及汝新婦等同居頗以自適但為微有耳疾大語方聞行動飲食幸無多損汝與吾別時年尚幼小以前家事或不委曲記也我昔在武川鎮生汝兄弟三人鮮于修禮起曰吾家先在博陵郡住相將欲向左人城至唐河北遇定州官軍汝祖及第二叔與戰皆沒叔母賀拔及兒元寶叔母紇于及兒菩薩并吾與汝六人俱為官兵執送元寶掌軍

時寶掌營唐城內經三日寶掌遣送吾與汝及所掠男女向京至定州城南夜宿同鄉人姬庫根家蠕蠕奴望見鮮于修禮營火逐光走至本營告吾等所在明旦汝叔將兵邀遮吾及汝等因得還營汝時年十二可不畧記此事由緣也後吾共汝居晉陽時元寶菩薩及汝姑兒賀蘭盛洛并汝四子從成博士學成性嚴惡汝等謀欲害之吾共汝叔母聞知各答其兒唯盛洛無母獨不被捶後爾朱天柱亡歲賀拔阿斗泥在關西遣人迎家

累汝叔亦遣奴迎汝及盛洛等汝時著緋綾袍銀裝帶
盛洛着紫織成纈並乘騾同去盛洛小於汝三人並喚
吾作摩敦此事當一一記之今寄汝小時所著錦袍表
一領至宜檢看知吾含悲抱戚多歷年紀禽獸草木母
子相依吾有何罪與汝分隔世間所有求皆可得母子
異國何處可求汝今貴極王公富過山海有一老母八
十之年飄然千里死亡旦夕不得一朝同處寒不得汝
衣饑不得汝食汝雖窮榮極盛於吾何益生前汝既不

得申其供養事往何論今日以後吾之殘命唯繫於汝
戴天覆地中有神明勿云冥昧而可欺負楊氏姑今皇
齊賜許先發關河阻遠隔絕多年書依常體慮汝致惑
是以每存款質兼亦載吾姓名當識此理勿以為怪護
性至孝得書悲不自勝左右莫能仰視報書云區宇分
崩遭遇災禍違離膝下三十五年受形稟氣皆知母子
誰知薩保如此不孝宿殃積戾唯應自受豈悟網羅上
嬰慈母但立身立行不負一物明神有識宜先哀憐而

子為公侯母為俘隸熱不見母熱寒不見母寒衣不知
有無食不知饑飽泯如天地之外無由覓聞晝夜悲號
繼之以血分懷冤酷終此一生死若有知冀奉見於泉
下耳不謂齊朝解網惠以德音摩敦四姑並許哀放初
聞此旨魂爽飛越號天叩地不能自勝四姑即蒙禮送
平安入境以今月十八日於河東拜見遙奉顏色崩慟
肝腸但離絕多年存亡阻隔相見之始口未忍言唯叙
齊朝寬弘每存大德云與摩敦雖處宮禁常存優禮今

者來鄴恩遇彌隆重降衿哀聽許摩敦垂勅曲盡悲酷
備述家事伏讀未周五情屠割書中所道無一事敢忘
摩敦年尊又加憂苦常謂寢食貶損或多遺漏伏奉論
述次第分明一則以悲一則以喜鄉里破敗之日薩保
年已十歲隣曲舊事猶自記憶況家門禍難親戚流離
奉辭時節先後慈訓刻肌刻骨常纏心腑天長喪亂四
海橫流太祖乘時齊朝撫運兩河三輔各運神機源其
事迹非相背負太祖升遐未定薩保屬當猶子之長親

受顧命雖身居重任職當憂責至於歲時稱慶子孫在
庭顧視悲摧心情斷絕胡顏履戴負媿神明齊朝霈然
之恩既已霑洽愛敬之至施及傍人草木有心禽魚感
澤況在人倫而不銘戴有國有家信義為本伏度來期
已應有日一得奉見慈顏永畢生願生死骨肉豈過今
恩負山戴岳未足勝荷二國分隔理無書信主上以彼
朝不絕母子之恩亦賜許奉答不期今日得通家問伏
紙嗚咽言不宣心蒙寄薩保別時所留錦袍表年歲雖

久宛然猶識抱此悲泣至於拜見事歸忍死知復何心
齊朝不即發遣更令重與護書要護重報護復書往返
至於再三而母竟不至朝議以其失信令有司移齊移
未送而母至舉朝慶悅大赦天下護與母睽隔多年一
朝團聚凡所資奉窮極華盛每四時伏臘武帝率諸親
戚行家人之禮稱觴上壽榮貴之極振古未聞也是年
突厥復率衆赴期護以齊氏初送國親未欲即事征討
復慮失信蕃夷更生邊患不得已遂請東征九月詔徵

二十四軍及左右廂散隸秦隴巴蜀之兵諸蕃國之衆
二十萬人十月帝於廟庭授護斧鉞出軍護至潼關乃
遣柱國尉遲迥統精兵十萬為前鋒大將軍權景宣率
山南兵出豫州少師楊柟出枳關護連營漸進屯軍弘
農迴圍洛陽柱國齊國公憲鄭國公達奚武等營邛山
護性無戎畧此行又非本心故師出雖久無功而還護
與諸將稽首請罪帝不之責天和二年護母薨尋詔起
令視事五年詔賜護軒懸之樂六佾之舞護性甚寬和

然暗於大體自恃建立之功久當權軸凡所委任皆非其人兼諸子貪殘僚屬縱溢恃護威勢莫不蠹政害民上下相蒙曾無疑慮帝以其暴慢密與衛王直圖之七年三月十八日護自同州還帝御文安殿見護訖引入含仁殿朝皇太后先是帝以禁中見護常行家人禮護謁太后太后必賜之坐帝每立侍至是護將入帝謂曰太后春秋至尊頗好酒喜怒有時乖比諫未蒙垂納兄今願更啟請因出懷中酒誥授護曰以此諫太后護

入如帝所誠跪讀未訖帝以玉珽自後擊之踣地又令
宦者何泉以御刀斫之泉懼斫不能傷時衛王直先匿
於戶內乃出斬之初帝欲圖護王軌宇文神舉宇文孝
伯頗預其謀是日軌等並在外更無知者殺護訖乃召
宮伯長孫覽等即令收護子柱國譚國公會大將軍呂
國公至崇業公靜正平公乾嘉及乾基乾光乾符乾祖
乾威等并柱國侯伏龍恩龍恩弟大將軍萬壽大將軍
劉勇中外府司錄尹公正袁傑膳部下大夫李安等於

殿中殺之齊王憲曰安出自阜隸所典庖厨而已未足
加戮帝曰汝不知耳世宗之崩安所為也十九日乃詔
暴護等罪大赦改天和七年為建德元年護世子訓為
蒲州刺史其夜遣柱國越公盛乘傳鎮蒲州徵訓赴京
師至同州賜死護長史叱羅協司錄馮遷及所親任者
皆除名護子昌城公深使突厥遣開府宇文德齋詔書
就殺之三年詔復護及諸子先封謚護曰蕩並改葬之
叱羅協代郡人本名與武帝諱同後改焉少寒微嘗為

州小吏以恭謹見知竇泰為御史中尉以協為書侍御史泰向潼關協為監軍泰死協見獲文帝授大丞相東閤祭酒累遷相府屬從事中郎協歷仕二京詳練故事又深自剋厲文帝頗委任之然猶以家屬在東疑其戀本及河橋戰敗協隨軍還文帝知協不貳封冠軍縣男進爵為侯後為大將軍尉遲迴長史率兵伐蜀行潼州事魏恭帝三年文帝徵協入朝論蜀中事乃賜姓宇文氏晉公護既殺孫恒李植等欲委腹心於司會柳慶司

憲令狐整等二人並辭俱薦協護遂徵協入朝引與同宿深寄託之協誓以軀命自効護大悅以為得協之晚稍遷護府長史進爵為公常在護側明帝知其材識庸淺每按抑之數謂曰汝何知也猶以護所親任每含容之及明帝崩便授協司會中大夫中外府長史協形貌瘦小舉措褊急既以得志每自矜高及其所言多乖事衷當時莫不笑之護以其忠已每提獎之協既受護重委冀得婚連帝室乃求復舊姓叱羅氏許之又進位柱

國護以協年老許其致仕而協貪榮未肯告退及護誅

除名建德三年以協宿齒授儀同三司賜爵南陽郡公

卒子金剛嗣馮遷字羽伐弘農人少修謹有幹能為護

府司錄性質直小心畏慎兼明練時事善於斷決每校

閱文簿孜孜不倦以此甚為護委任後授陝州刺史遷

本寒微不為時輩所重一旦刺舉本州以謙恭接待鄉

邑人無怨者復入為司隸累遷小司空自天和後以年

老委任稍衰及護誅猶除名卒於家子恕位儀同三司

杞簡公連幼而謹厚臨敵果毅隨德皇帝遇定州官軍於唐河北俱戰沒保定初追贈太傅柱國大將軍大司徒封杞國公諡曰簡子元寶為齊神武所害保定初追贈大將軍小司徒襲封杞國公諡曰烈以章武公導子亮嗣亮字乾德位梁州總管及豳國公廣薨以梁為秦州總管廣所部悉以配焉在州甚無政績尋進柱國從東伐進上柱國仍從平鄴遷大司徒大象初以行軍總管與元帥鄖國公韋孝寬等伐陳還至豫州密謀襲孝

寬營將圖反逆孝寬有備亮不得入遂遁走孝寬追斬之子胄明坐亮誅詔以亮弟椿為烈公後椿字乾壽位上柱國大司徒大定中為隋文帝所害并其五子

莒莊公洛生少任俠好施愛士北州賢俊皆與之遊而才能皆出其下及葛榮殺鮮于修禮以洛生為漁陽王仍領德皇帝餘衆時人皆呼為洛生王洛生善撫將士是以克獲常冠諸軍爾朱榮定山東時洛生在虜中榮雅聞其名心憚焉尋為榮所害保定初追贈大將軍封

莒國公諡曰莊子菩薩為齊神武所害保定初追贈大將軍小宗伯襲爵諡曰穆以晉公護子至嗣至字乾附後坐父護誅詔以衛王直子賓為穆公後賓字乾瑞尋坐直誅以齊王憲子廣都公貢襲貢字乾貞宣帝初被誅國除

虞國公仲德皇帝從父兄也卒于代保定初追贈太傅柱國大將軍大司徒封虞國公子興嗣興生屬兵亂與仲相失年幼莫知其戚屬遠近與文帝兄弟初不相識

沙苑之敗預在行間被虜隨例散配諸軍興性弘厚有
志度雖流離世故而風範可觀保定二年詔訪仲子孫
興始附屬藉武帝以興帝戚近屬尊禮之甚厚位開府
儀同三司宗師襲爵虞國公薨贈柱國大將軍謚曰靖
子洛嗣位儀同三司隋初為介國公為隋室賓云

廣川公測字澄鏡文帝之族子也高祖中山曾祖豆頹
祖麒麟父永仕魏位並顯達測性沉密少篤學每旬月
不窺戶牖起家奉朝請厯司徒右長史尚魏宣武女陽

平公主拜駙馬都尉及魏孝武疑齊神武有異圖詔測

詣文帝令密為之備文帝見之甚歡還封廣川縣伯尋

從魏孝武西遷進爵為公文帝為丞相以測為右長史

軍國政事多委任之又令測詳定宗室昭穆遠近附於

屬籍大統中除驃騎大將軍侍中開府儀同三司行汾

州事測政存簡惠頗得民和地接東魏數相抄竊或有

獲其為寇者多縛送之測皆命解縛置之賓館然後引

與相見如客禮焉仍設酒餼宴勞放還其國并給糧餼

衛送出境自是東魏人大慙乃不為寇汾晉之間各安其業兩界之民遂通慶弔即不復為仇讐矣時論稱之方於羊叔子或告測與外境交通懷貳心者文帝怒曰測為我安邊吾知其無貳志何為間我骨肉生此貝錦乃命斬之仍許測以便宜從事八年轉行綏州事先是每歲河冰合郡將則徙民入城堡以避突厥寇掠測至令安堵如故乃於要路數百處積柴仍遠斥候知其動靜是年十二月突厥從連谷入寇去界數十里測命積

柴之處一時縱火突厥謂大軍至懼而逃走自相蹂踐
委棄雜畜輜重不可勝數測徐率所部收入自是突厥
不敢復至因請置戍兵以備之十年徵拜太子少保卒
文帝親臨慟焉諡曰靖測性仁恕好施與衣食之外家
無積蓄在洛陽日嘗被竊盜其妻陽平公主衣服皆在
失中州縣禽盜并物測恐此盜竊公主衣服當死云此
賊非是賊遂遇赦得免其人既感恩請為測左右及測
從孝武西遷事極狼狽盜人從測竟無異志子該嗣位

徐州刺史測弟深字奴干性鯁正有器局年數歲戲累石為營伍折草作旌旗布置行列皆有軍陣之勢父永遇見之大喜曰汝自然知此於後必為名將永安初起家祕書郎領宿衛軍及齊神武舉兵入洛陽魏孝武西遷既事起倉卒人多逃散深撫循所部並得入關以功賜爵長樂縣伯文帝以深有謀畧欲引置左右圖議政事大統元年乃啓為丞相府主簿累轉尚書直事郎中及齊神武屯蒲坂分遣其將竇泰趣潼關高敖曹圍洛

州文帝將襲秦諸將咸難之文帝乃隱其事陽若未有謀者而獨問策於深深曰竇秦歡之驍將也頑凶而勇戰亟勝而輕敵歡每伏之以為禦侮今者大軍若就蒲坂則高歡拒守竇氏必援之内外受敵取敗之道也不如選輕銳之卒潛出小關竇性急必來決戰高歡持重未即救之則竇可擒也既虜竇歡勢自沮迴師禦之可以制勝文帝喜曰是吾心也軍遂行果獲秦而齊神武亦退深又說文帝進取弘農復剋之文帝大悅謂深曰

君即吾家之陳平也是冬齊神武又率大衆度河涉洛
至沙苑諸將皆有懼色唯深獨賀文帝詰曰賊來充斥
何賀之有對曰高歡之撫河北甚得衆心雖乏智謀人
皆用命以此自守未易可圖今懸兵渡河非衆所欲唯
歡恥失竇氏復諫而來所謂忿兵一戰可禽也此事昭
然不賀何為請假深一節發王羆之兵邀其走路使無
遺類矣文帝然之尋而大破齊軍果如所策俄進爵為
侯六官建拜小吏部下大夫遷中大夫武成元年遷幽

州刺史改封安化縣公保定初除京兆尹入為司會中
大夫深少喪父事兄甚謹性多奇譎好讀兵書既居近
侍每得進籌策及在選曹頗獲時譽性仁愛情隆宗黨
從弟神舉神慶幼孤深撫訓之義均同氣世尤以此稱
焉卒于位諡曰成康子孝伯字胡玉其生與武帝同日
文帝甚愛之養於第內及長又與武帝同學武成九年
拜宗師上士時年十六性沈正謇諤好直言武帝即位
欲引置左右時政在家臣不得專制乃託言少與同業

受經思相啟發由是護弗之猜得入為右侍上士恒侍
讀及遭父憂詔令服中襲爵武帝嘗謂曰公於我猶漢
高與盧綰也賜以十三鉉金帶自是恒侍左右出入卧
内朝務皆得預焉孝伯亦竭心盡力無所迴避至於時
政得失外間細事皆以奏聞帝信委之當時莫比及帝
將誅晉公護密與衛王直圖之他無知者唯孝伯及王
軌宇文神舉頗得參預護誅授開府儀同三司厯司會
中大夫左宮正皇太子既無令德孝伯言於帝曰皇太

子德聲未聞請妙選正人為其師友調護聖質不然悔
無所及帝歛容曰卿世載鯁直竭誠所事觀卿所言有
家風矣孝伯拜謝曰非言之難受之難也深願陛下思
之帝曰正人豈復過君於是以尉遲運為右宮正孝伯
仍為左宮正宗師中大夫累遷右宮伯嘗因侍坐帝問
吾兒比進善不對曰皇太子比懼天威殊無罪失及王
軌因內宴將帝鬚言太子之不善帝罷酒責孝伯曰公
常謂我云太子無過今聞軌言公為誑矣孝伯拜曰臣

聞父子之際人所難言臣知陛下不能割情忍愛遂爾
結舌帝知其意默然久之乃曰朕已委公公其勉之及
大軍東討拜內史下大夫令掌留臺事軍還帝曰居守
之重無忝戰功於是加授大將軍進爵廣陵郡公并賜
女妓金帛等復為宗師每車駕巡幸常執其手令居守
後事帝北討至雲陽宮寢疾驛召孝伯赴行在所執其
手曰吾自量必無濟理以後事付君是夜授司衛上大
夫總宿衛兵馬令馳驛入京鎮守宣帝即位授小冢宰

帝忌齊王憲意欲除之謂孝伯曰公能圖之當以其官位相授孝伯叩頭曰齊王戚近勲高棟梁所寄臣若順旨則臣為不忠陛下為不孝之子也帝因踈之乃與于智鄭譯等圖其事令智告憲謀逆遣孝伯召入誅之帝之為太子西征也在軍有過行鄭譯時亦預焉軍還孝伯及王軌盡以白武帝武帝怒撻帝數十乃除譯名至是帝追憾被杖乃問譯我脚上杖痕誰所為也譯曰事由宇文孝伯王軌譯又說軌捋帝鬚事帝乃誅軌尉遲

運懼私謂孝伯曰吾徒必不免禍奈何孝伯曰今堂上有老母地下有武帝為臣為子知欲何之且委質事人本徇名義諫而不入將焉逃死足下若為身計宜自遠之於是各行其志運尋出為秦州總管帝荒淫日甚誅戮無度孝伯頻諫不從由是益踈後稽胡反令孝伯為行軍總管從越王盛討平之及軍還帝將殺之乃託以齊王事誚之曰公知齊王謀反何以不言對曰臣知齊王忠於社稷為羣小媒孽加之以罪臣以言必不用所

以不言且先帝屬微臣輔陛下今諫而不從實負顧託
以此為罪是所甘心帝慙俛首不語令賜死于家時年
三十六及隋文帝踐極以孝伯王軌忠而獲罪並令收
葬復其官爵嘗謂高頴曰宇文孝伯寔有周良臣此人
若在我輩無措手處子歆嗣

東平公神舉文帝之族子也高祖普陵曾祖求男仕魏
位並顯達祖金殿魏兗州刺史安喜縣侯父顯和少而
襲爵性矜嚴頗涉經史膂力絕人彎弓數百斤能左右

馳射孝武之在蕃顯和早蒙眷遇時屬多難嘗問計於顯和顯和具陳宜杜門晦迹相時而動帝深納焉及即位拜閣内都督封城陽縣公以恩舊遇之甚厚顯和所居隘陋乃撤殿省賜為寢室其見重如此及齊神武專政帝每不自安問顯和曰天下汹汹將如之何對曰莫若擇善而從因誦詩云彼美人兮西方之人兮帝曰是吾心也遂定入關策以其母老令預為計對曰今日之事忠孝不並然臣不密則失身安敢預為私計帝愴然

改容曰卿我之王陵也遷朱衣直閤閤內大都督改封
長廣縣公從孝武入關周文見而善之進位車騎大將
軍儀同三司散騎常侍卒建德三年追贈驃騎大將軍
開府儀同三司神舉早孤有夙成之量及長神情倜儻
志畧英贍眉目踈朗儀貌魁梧明帝初起家中侍上士
帝留意翰林而神舉雅好篇什每游幸神舉恒從襲爵
長廣縣公天和元年累遷右宮伯中大夫進爵清河郡
公建德三年自京兆尹出為熊州刺史齊人憚其威名

及帝東伐從平并州即授刺史州既齊氏別都多有姦猾神舉示以威恩遠近悅服改封武德郡公進柱國大將軍又改封東平郡公宣政元年轉司武上大夫及幽州人盧昌期等據范陽反詔神舉討禽之時齊黃門侍郎盧思道亦在反中賊平將解衣伏法神舉乃釋而禮之即令草露布屬稽胡反寇西河復詔神舉與越王盛討之時突厥赴救神舉以奇兵擊之突厥敗走稽胡欵服即授并州總管神舉見待於武帝處心腹之任王軌

宇文孝伯等屢言皇太子之短神舉亦預焉及宣帝即位神舉懼及禍懷不自安初神舉定范陽之後威聲甚振帝亦忌其名望無以宿憾遂使人齎鴆賜之薨於馬邑時年四十八神舉美風儀善辭令博涉經史性愛篇章尤工騎射臨戎對寇勇而有謀莅職當官每著聲績兼好施愛士以雄豪自居故得任兼文武聲彰外內百僚無不仰其風則先輩宿齒至于今稱之子同嗣位至儀同大將軍神舉弟慶字神慶沈深有器局少以聰敏

見知初受業東觀頗涉經史既而謂人曰書足記姓名而已安能久事筆硯為腐儒事業乎時文州賊亂慶應募從征以功授都督衛王直鎮山南引為左右慶善射有膽氣好格猛獸直甚壯之稍遷車騎大將軍儀同三司及誅宇文護慶有謀焉進授驃騎大將軍加開府從武帝攻河陰先登攀堞與賊短兵相接中石乃墮絕而復蘇帝勞之曰卿勇可以賈人也復從武帝拔晉州齊兵大至慶與齊王憲輕騎覘之卒與賊窘憲挺身而遁

慶退據汾橋衆賊爭進慶射之所中人馬必斃賊乃稍却及拔高壁剋并州下信都禽高潛功並居最進位大將軍封汝南郡公尋以行軍總管擊延安反胡平之厯延寧二州總管隋文帝為丞相以行軍總管征江表次白帝以勞進上大將軍帝與慶有舊甚見親待令督丞相軍事悉以心腹尋加柱國開皇初拜左武衛將軍進上柱國數年除涼州總管歲餘徵還不任以職文帝每加優禮卒於家子靜亂尚隋文帝女廣平公主位儀同

安德縣公熊州刺史先慶卒靜亂子協位右翊衛將軍
宇文化及之亂遇害協弟晶字婆羅門大業中養于宮
內後為千牛左右煬帝甚親昵之每有游宴必侍從至
於出入卧內伺察六宮往來不限門禁時人號為宇文
三郎與宮人淫亂至於妃嬪公主亦有醜聲蕭后言於
帝晶聞懼不敢見協因奏晶壯不可久在宮掖帝不之
罪召入待之如初化及弑逆之際為亂兵所害

文帝十王

文帝十三男姚夫人生明帝後宮生宋獻公震文元皇
后生孝閔皇帝文皇后叱奴氏生武帝衛刺王直達步
于妃生齊煬王憲王姬生趙僭王招後宮生譙孝王儉
陳惑王純越野王盛代燹王達冀康王通滕聞王道
宋獻公震字彌俄突幼而敏達大統十六年封武邑公
尚魏文帝女其年薨保定元年追贈大司馬封宋國公
無子以明帝第三子實嗣建德三年進爵為王大象中
為大前疑尋為隋文帝所害國除

衛刺王直字豆羅突魏恭帝三年封秦郡公武成初進
封衛國公歷雍州牧大司空襄州總管直武帝母弟也
性浮詭以晉公護執政遂貳於帝而昵護及南討軍敗
愠於免黜又請帝除護帝宿有誅護意遂與直謀之及
護誅帝以齊王憲為大冢宰直既乖本望又請為大司
馬欲擅威權帝知其意謂曰汝兄弟長幼有序何反居
下列也以為大司徒建德三年進爵為王初帝以直第
為東宮更使直自擇所居直歷觀府署無稱意者至廢

陟圯佛寺遂欲居之齊王憲謂曰兄兒女成長此寺褊小詎是所宜直曰一身尚不自容何論兒女憲怪而疑之直常從帝校獵而亂行帝怒對衆撻之自是憤怨滋甚及帝幸雲陽宮直在京師反攻肅章門司武尉遲運閉門不得入退走追至荊州獲之免為庶人囚諸宮中尋復有異志及其子十人並誅之國除

齊煬王憲字毗賀突文帝第五子也性通敏有度量雖在童齒而神彩嶷然初封涪城縣公少與武帝俱授詩

傳咸綜機要得其指歸文帝嘗賜諸子良馬惟其所擇
憲獨取駿者帝問之對曰此馬色類既殊或是駿逸若
從軍征伐牧圉易分帝喜曰此兒識智不凡當成重器
後從獵上隴經官馬牧帝每見駿馬駿者輒曰此我兒
馬也令左右取以賜之魏恭帝元年進封安成郡公孝
閔帝踐阼拜驃騎大將軍武成初除益州總管梁益等
二十四州諸軍事益州刺史進封齊國公邑萬戶初平
蜀之後文帝以其形勝之地不欲使宿將居之諸子之

中欲有推擇徧問武帝以下誰欲此行並未及對而憲
先請文帝曰刺史當撫衆理民非爾所及以年授者當
歸爾兄憲曰才用有殊不關大小試而無効甘受面欺
文帝大悅以憲年尚幼未之遣也明帝追遵先旨故有
此授憲時年十六善於綏撫留心政術辭訟輻湊聽受
不疲蜀人悅之共立碑頌德保定中徵拜雍州牧及晉
公護東伐以尉遲迴為前鋒圍洛陽齊兵數萬奄出軍
後諸軍恒駭並各退散唯憲與王雄達奚武拒之而雄

為齊人所敗三軍震懼憲自督勵衆心乃安時晉公護
執政雅相親委賞罰之際皆得預焉天和三年以憲為
大司馬行小冢宰雍州牧如故四年齊將獨孤永業來
寇詔憲與柱國李穆出宜陽築崇德等五城絕其糧道
齊將斛律明月築壘洛南五年憲涉洛邀擊之明月遁
走是歲齊斛律明月又率大衆於汾北築城西至龍門
晉公護問計於憲憲曰如憲所見兄宜暫出同州以為
威勢憲請以精兵居前隨機攻取非惟邊境清寧亦當

有所剋獲護然之六年遣憲率衆二萬出自龍門齊將
新蔡王康德潛軍宵遁憲乃渡河攻其伏龍等四城二
日盡拔又進攻張壁克之獲其軍實夷其城壘斛律明
月時在華容弗能救乃北攻姚襄城陷之時汾州見圍
日久憲遣柱國宇文盛運粟饋之憲自入兩乳谷襲剋
齊伯杜城使柱國譚公會茆石殿城以為汾州之援齊
平原王段孝先蘭陵王長恭引兵大至大將軍韓歡為
齊人所乘遂退憲身自督戰齊衆稍却會日暮乃各收

軍及晉公護誅武帝召憲入憲免冠拜謝帝謂之曰冢
宰無君陵上吾所以誅之以安社稷汝親則同氣休戚
共之事不相涉何煩致謝乃詔憲往護第收兵符及諸
簿籍等尋以為大冢宰時帝既誅宰臣親覽朝政方欲
齊之以刑爰及親親亦為刻薄憲以為護所任自天和
之後威勢漸隆護欲有所陳多令憲聞奏其間或有可
否憲慮生嫌隙每曲而暢之帝亦悉其此心故得無患
然猶以威名過重終不能平雖遷授冢宰實奪其權也

開府裴文舉憲之侍讀帝嘗御內殿引見之謂曰晉公
不臣之迹朝野所知昔魏末不綱太祖匡輔元氏有周
受命晉公復執威權積習生常便謂法應須爾豈有三
十歲天子而可為人所制乎且近代以來又有一弊暫
經隸屬便即禮若君臣此乃亂世之權宜非經國之治
術詩云夙夜非懈以事一人者本據天子爾雖陪侍齊
公不得即同臣主且太祖十兒寧可悉為天子卿宜規
以正道勸以義方輯睦我君臣協我骨肉無令兄弟自

致嫌疑文舉拜謝而出歸以白憲憲指心撫几曰吾之宿心公寧不悉但當盡心竭節知復何言建德三年進爵為王憲友劉休徵獻王箴一首憲美之休徵後又以箴上之帝方剪削諸弟甚悅其文憲嘗以兵書繁廣難求指要乃自刊定為要畧五篇至是表陳之帝覽而稱善其秋帝幸雲陽宮寢疾衛王直於京師舉兵帝召憲謂曰衛王為逆汝知之乎憲對曰臣初不知今始奉詔直若違天犯順此則自取滅亡帝曰汝便為前軍吾亦

續發直尋敗走帝至京師憲與趙王招俱入拜謝帝曰
管蔡為戮周公作輔人心不同有如其面但媿兄弟親
尋干戈於我為不能耳初直內深忌憲憲隱而容之且
以帝之母弟每加友愛晉公護之誅也直固請及憲帝
曰齊公心迹吾自悉之不得更有所疑也及文宣皇后
崩直又啓憲飲酒食肉與平昔不異帝曰吾與齊王異
生俱非正嫡特為吾意今袒括是同汝當媿之何論得
失汝親太后之子但須自勗直乃止四年帝將東討獨

與內史王誼謀之餘人莫得知也後以諸弟才略無出
憲右遂告之憲即贊成其事及大軍將出憲表上私財
以助軍費曰昔邊防未靜卜式願上私財江湖不澄衛
茲請獻私粟臣雖不敏敢志景行詔不納而以憲表示
公卿曰人臣當如此朕貴其心耳寧資此物乎乃詔憲
為前軍趣黎陽帝親圍河陰未剋憲攻拔武濟進圍洛
口拔其東西二城以帝疾班師是歲初置上柱國官以
憲為之五年大舉東討憲率精騎五萬復為前鋒守雀

鼠谷帝親圍晉州憲進剋洪洞永安二城更圖進取齊
主聞晉州見圍乃將兵十萬自來援之時柱國陳王純
頓軍千里徑大將軍永昌公椿屯雞棲原大將軍宇文
盛守汾水關並受憲節度憲密謂椿曰兵者詭道去留
不定見機而作不得遵常汝今為營不須張幕可伐栢
為菴示有處所令兵夜去之後賊尤致疑也時齊主分
軍萬人向千里徑又令其衆出汾水關自率大兵與椿
對宇文盛馳告急憲自救之齊人遽退盛與柱國侯莫

陳芮逐之多有斬獲俄而椿告齊衆稍逼憲又救之會
椿被勅追還率兵夜反齊人果謂栢菴為帳幕不疑軍
退翌日始悟時帝已去晉州留憲為後拒齊主自率衆
來追至於高梁橋憲以精騎二千阻水為陣齊領軍段
暢直進至橋憲隔水招暢與語語畢問曰若何姓名暢
曰領軍段暢也公復為誰憲曰我虞侯大都督耳暢曰
觀公言語不是凡人今日相見何用隱其名位憲乃曰
我天子大弟齊王也徧指陳王純已下並以告之暢鞭

馬而去憲即命旋軍而齊人遽追之戈甲甚銳憲與開府宇文忻各統精銳百騎為殿以拒之斬其驍將賀蘭豹子山褥瓌等百餘人齊衆乃退憲度汾而會帝於玉壁帝又令憲率兵六萬還援晉州齊主攻圍晉州尋而帝東轅次于高顯憲率所部先向晉州明日諸軍總集稍逼城下齊人亦大出兵陣於城南帝詔憲馳往觀之憲反命曰易與耳請破之而後食帝悅曰汝之所言吾無憂矣既而諸軍俱進應時大潰其夜齊主遁走齊人

復據高壁及洛女帝命憲攻洛女破之齊王遂走鄴留
其從兄安德王延宗據并州延宗因僭偽號帝圍其城
憲攻其西面剋之禽延宗以功封第二子安成公質為
河間王拜第三子竇為大將軍仍詔憲先驅趣鄴進剋
鄴城憲善兵權多籌略長於撫御推鋒陷陣為士卒先
齊人聞風憚其勇略齊任城王潛廣寧王孝珩等據信
都有衆數萬帝復詔憲討之仍令齊主手書招潛潛不
納憲軍過趙州潛令間諜二人覘候騎執以白憲憲

乃集齊舊將徧示之曰吾所爭者大不在汝等即放還
令充使乃與潛書憲至信都潛陣於城南憲登張耳冢
以望之俄而潛所署領軍尉相願偽出略陣遂以衆降
潛殺其妻子相願潛心腹也衆甚駭遂破之禽潛及孝
珩等先是稽胡劉沒鐸自稱皇帝又詔憲督趙王招等
平之憲自以威名日重潛思屏退及帝欲親征北蕃乃
辭以疾帝變色曰汝若憚行誰為我任使者憲懼曰臣
陪奉鑒興誠為本願但身嬰疾疾不堪領兵帝許之尋

而武帝崩宣帝嗣位以憲屬尊望重深相忌憚時武帝未葬諸王在內居服司衛長孫覽總兵輔政恐諸王有異志奏令開府于智察其動靜及山陵還諸王歸第帝又命智就宅候憲因是告憲有異謀帝乃遣小豕宰宇文孝伯謂憲曰三公之位宜屬親賢今欲以叔為太師何如憲對曰臣材輕位重滿盈是懼三師之任非所敢當孝伯反命尋而復來曰詔王晚共諸王俱入既至殿門憲獨被引進帝先伏壯士於別室至即執之憲辭色

不撓固自陳說帝使于智對憲憲目光如炬與智相質
或謂憲曰以王今日事勢何用多言憲曰我位重屬尊
一旦至此死生有命寧復圖存但以老母在堂恐留慈
恨耳因擲笏於地乃縊之時年三十五帝以于智為柱
國封齊國公又殺上大將軍安邑公王興上開府獨孤
熊開府豆盧紹等皆以昵於憲也帝既誅憲無以為辭
故託興等與憲結謀遂加戮焉時人知其冤酷咸云伴
憲死也憲所生達步于氏蠕蠕人也建德三年上冊為

齊國太妃憲有至性事母以孝聞太妃舊患風熱屢經發動憲衣不解帶扶持左右憲或東西從役每心驚母必有疾乃馳使參問果如所慮憲六子貴質實貢乾禧乾洽貴字乾福少聰敏尤便騎射始讀孝經便謂人曰讀此一經足為立身之本十歲封安定郡公文帝始封此郡未嘗假人至是封焉年十一從憲獵於鹽州一圍中手射野馬及鹿一十有五建德二年拜齊國世子後出為幽州總管貴雖出自深宮而留心庶政性聰敏過

目輒記嘗道逢二人謂其左右曰此人是縣黨何因輒行左右不識貴便述其姓名莫不嗟伏白虎烽經為商人所燒烽帥受貨不言其罪他日此帥隨例來參貴乃問云商人燒烽何因私放烽帥愕然遂即首伏其明察如此卒時年十七武帝甚痛惜之質字乾祐以憲勲封河間郡王質字乾禮中頃公貢出後莒莊公乾禧安成公乾洽龍涸公並與憲俱被誅

趙僭王招字亶盧突幼聰穎博涉羣書好屬文學庾信

體詞多輕豔魏恭帝三年封正平郡公武成初進封趙國公歷益州總管大司空大司馬進爵為王除雍州牧建德五年從武帝定東夏以功進位上柱國又與齊王憲討平稽胡斬賊帥劉沒鐸宣政中拜太師大象元年詔以洛州襄國郡邑萬戶為趙王國招出就國二年宣帝不豫徵招及陳越代滕五王赴闕比招等至而帝已崩隋文帝輔政加招等殊禮入朝不趨劔履上殿隋文將遷周鼎招密欲圖之以匡社稷乃要隋文帝至第飲

於寢室招子員貫及妃帝魯封所親人史胄皆先在室
左右佩刀而立又藏兵刃於帷席之間後院亦伏壯士
隋文帝從者多在閣外唯楊弘元胄胄弟威及陶徹坐
於戶側招屢以佩刀割瓜啗隋文隋文未之疑元胄覺
變扣刀而入招乃以大觴親飲胄酒又命胄向厨取漿
胄不為之動滕王逌後至隋文降階迎胄因得耳語曰
形勢大異公宜速出隋文共逌等就坐須臾辭出後事
覺陷以謀反其年誅招及其子德廣公員永康王貫越

公乾銑弟乾鏗等國除招所著文集十卷行於世

譙孝王儉字侯幼突武成初封譙國公建德三年進爵為王從平鄴拜大冢宰薨子乾暉嗣為隋文帝所害國除

陳惑王純字堙智突武成初封陳國公保定中使突厥迎皇后厯秦陝二州總管建德三年進爵為王從平齊進位上柱國厯并州總管雍州牧太傅大象元年詔以濟南郡邑萬戶為陳國純出就國二年朝京師并其子

為隋文帝所害國除

越野王盛字立久突武成初封越國公建德三年進爵
為王從平齊進位上柱國歷相州總管大冢宰大象元
年遷大前疑太保其年詔以豐州武當安昌二郡邑萬
戶為越國盛出就國二年朝京師并其子為隋文所害
國除

代曩王達字度斤突性果決善騎射武成初封代國公
建德初進位柱國出為荊州刺史在州有政績武帝手

勅褒美之所部澧州刺史蔡澤以贓敗達以其世著勲
庸欲曲法貸之恐虧公憲密表奏之事竟得釋其處事
周慎如此達雅好節儉食無兼膳侍姬不過數四衣皆
弊故又未嘗營資產國無儲積左右嘗以為言達從容
應之曰君子憂道不憂貧何煩於此三年進爵為王武
帝東伐以為右軍總管齊淑妃馮氏尤美齊後主所幸
齊平帝以達不邇聲色特以馮氏賜之宣帝即位進上
柱國大象元年拜大右弼其年詔以潞州上黨郡邑萬

戶為代國達出就國二年朝京師及子俱為隋文帝所害國除

冀康公通字屈率突武成初封冀國公薨子絢嗣建德三年進爵為王大定中亦為隋文帝所害國除

滕聞王通字爾固突少好經史解屬文武成初封滕國公建德三年進爵為王宣政元年進位上柱國大象元年詔以荊州新野郡邑萬戶為滕國通出就國二年朝京師為隋文帝所害并其二子國除通所著文章頗行

於世

孝閔一王

孝閔帝一男陸夫人生紀厲王康字乾安保定初封紀國公建德三年進爵為王出為利州總管驕侈無軌度陰有異謀司錄裴融諫康殺之五年詔賜康死子湜嗣大定中為隋文帝所害國除

明帝三王

明帝三男徐妃生畢刺王賢後宮生鄧王貞宋王實實

出後宋獻公震

畢刺史王賢字乾陽保定四年封畢公建德三年進爵為王歷荊州總管大司空大象初進上柱國雍州牧太師明年宣帝崩賢性彊濟有威略慮隋文帝傾覆宗祏言泄并其子被害國除

鄧王貞字乾雅初封鄧國公建德三年進爵為王大象中為大冢宰大定中并其子為隋文帝所害國除

武帝六王

武帝七男李皇后生宣帝漢王贊庫汙姬生秦王贄曹
王允馮姬生道王允薛世婦生蔡王允鄭姬生荆王元
漢王贊字乾依初封漢國公建德三年進爵為王大象
末隋文帝輔政欲順物情乃進贊位上柱國拜右大丞
相大冢宰外示尊崇實無所綜理轉太師及諸方略定
尋與秦王贄曹王允道王允蔡王允荆王元並害之并
其子孫無遺

宣帝二王

宣帝三男朱皇后生靜帝王姬生萊王衍皇甫姬生郢王術衍及術並大象二年為隋文帝所害國除

隋

蔡景王整文帝之次弟也文帝四弟唯整及滕穆王瓚與帝同生次道宣王嵩次衛昭王爽並異母整周明帝時以武元帝軍功賜爵陳留郡公位開府車騎大將軍從武帝平齊力戰而死文帝初居武元之憂率諸弟負土為墳人植一柏四根鬱茂西北一根整所栽者獨瘁

後因大風雨并根失之整果不得善終文帝為相國贈

柱國大司徒八州刺史及受禪追封蔡王諡曰景子智

積襲又封其弟智明為高陽郡公智才開化縣公尋拜

智積開府儀同三司授同州刺史儀衛資送甚盛整娶

同郡尉遲綱女生智積開皇中有司奏智積將葬尉遲

太妃帝因曰是家昔幾殺我我有同生二弟並恃婦家

勢見陵我向之笑云爾既嗔我不可與爾角嗔並云阿

兄只倚頭額時有醫師邊隱逐勢言我後百日當病癰

二弟私喜以告父母父母泣謂我曰爾二弟大劇不能
愛兄我言不愛其親而愛他人者謂之悖德一日有天
下當改其姓為悖父母許之父母亡後二弟及婦復讒
我於晉公我每自外還及門輒不喜如入牢獄常託以
患氣鎖閣靜坐唯食至乃暫開當時實不可耐反美世
人無兄弟者蓋貧家兄弟多相愛由有無相假藉達官
兄弟多相憎由爭形勢故也智積在同州未嘗嬉戲游
獵聽政之暇端坐讀書門無私謁有侍讀公孫尚義山

東儒士府佐楊君英蕭德言並有文學時延於座所設
唯餅果酒財三酌家有女妓唯年節嘉慶奏於太妃之
前其簡靜如此文帝既與景王不睦其太妃尉遲氏又
與獨孤后不相諧以是智積常懷危懼每自貶損帝亦
以是哀憐之或勸智積治產業者智積曰昔平原露朽
財帛苦其多也吾幸無可露何更營乎有五男止教讀
論語孝經而已亦不令交通賓客或問其故答曰恐兒
子有才能以致禍也開皇二十年徵還京無他職任闔

門自守非朝覲不出場帝即位滕王綸衛王集並以讒
構得罪高陽公智明亦以交通奪爵智積愈懼大業三
年授弘農太守委政寮佐清靜自居及楊玄感作亂自
東都引軍而西智積謂官屬曰玄感聞大軍將至欲西
圖關中若成其計則根本固矣當以計縻之使不得進
不出一旬自可禽耳及玄感以軍至城下智積登陴詈
辱之玄感怒甚留攻之城門為賊所燒智積乃更益火
賊不得入數日宇文述等援軍至合擊破之尋拜宗正

卿十二年從駕江都寢疾帝時踈薄骨肉智積每不自安及遇患不呼醫臨終謂所親曰吾今始知得保首領沒於地矣時人哀之有子道元

滕穆王瓚字恒生一名慧仕周世以武元帝軍功封竟陵郡公尚武帝妹順陽公主授儀同保定四年累遷納言瓚貴公子又尚主美姿儀好書愛士甚有令名於當時時人號曰楊三郎武帝甚親愛之平齊之後諸王咸從留瓚居宇帝謂之曰六府事殷一以相委朕將遂事

東方無西顧之憂矣宣帝即位遷吏部中大夫加上儀
同宣帝崩文帝入禁中將總朝政令子勇召之欲有計
議璿素與文帝不協聞命不從曰作隋國公恐不能保
何乃更為族滅事耶文帝作相拜太宗伯典修禮律進
位上柱國封邵國公璿見帝執政羣議不一恐為家禍
陰有圖文帝之計文帝每優容之及受禪立為滕王拜
雍州牧帝數與同坐呼為阿三後坐事去牧以王就第
璿妃宇文氏先與獨孤皇后不平及此鬱鬱不得志陰

有呪詛帝命瓚出之瓚不忍離絕固請帝不得已從之
宇文氏竟除屬籍瓚由是忤旨恩禮更薄開皇十一年
從幸栗園坐樹下方飲酒鼻忽流血暴薨時年四十四
謚曰穆人皆言其遇鴆也子綸嗣綸字斌藹性弘厚美
姿容頗知鍾律文帝受禪封邵國公明年拜邵州刺史
晉王廣納妃於梁詔綸致禮甚為梁人所敬綸以穆王
故當文帝世每不自安煬帝即位尤被猜忌綸憂懼呼
術者王姿問之姿曰王相祿不凡滕即騰也此字足為

善應有沙門惠恩崛多等頗解占候綸每與交通常令此三人為厭勝法有人告綸怨望呪詛帝令黃門侍郎王弘窮驗之弘希旨奏綸厭蠱惡逆坐當死帝令公卿議之司徒楊素等曰綸懷惡之由積自家世惟皇運之始四海同心在於孔懷彌須協力其先乃離阻大謀棄同即異父悖於前子逆於後為惡有狀其罪莫大請依前科帝以皇族不忍除名徙邊大業七年帝征遼東綸欲上表請從軍自効為郡司所遏未幾徙珠崖及天下

大亂為賊林仕弘所逼攜妻子竄儋耳後歸唐封懷化
縣公尋病卒綸弟坦字文籀初封竟陵公坐綸徙長沙
坦弟猛字武籀徙衡山猛弟溫字明籀初徙零陵溫好
學解屬文既而作零陵賦以自寄其詞哀思帝見而怒
之轉徙南海溫弟詵字弘籀前亦徙零陵帝以其修謹
徵還襲封滕王以奉穆王祀大業末於江都為宇文化
及所害

道宣王嵩在周以武元帝軍功賜爵興城公早卒文帝

受禪追封謚焉以滕穆王瓚子靜襲卒謚曰悼無子以蔡王智積子世澄襲

衛昭王爽字師仁小字明達在周以武元帝軍功於襁褓中封同安郡公六歲而武元崩為獻皇后所養由是寵愛特異諸弟年十七為內史上大夫文帝執政授蒲州刺史柱國及受禪立為衛王所生李氏為太妃爽位雍州牧右領軍大將軍權領并州總管上柱國涼州總管爽美風儀有器局政甚有聲大軍北伐河間王弘豆

盧勣竇榮定高潁虞世則等分道而進以爽為元帥俱受爽節度爽親率李充等四將出朔州遇沙鉢略可汗於白道接戰大破之沙鉢略中重創而遁帝大悅賜爽真食梁安縣千戶六年復為元帥步騎十五萬出合川突厥遁逃徵為納言帝甚重之未幾爽疾帝遣薛榮宗視之云衆鬼為厲爽令左右驅逐之居數日有鬼物來擊榮宗榮宗走下階而斃其夜爽薨年二十五贈太尉冀州刺史子集嗣集字文會初封遂安王尋襲封衛王

煬帝時諸侯恩禮漸薄猜防日甚集憂懼乃呼術者俞
普明章醮以祈福助有人告集呪詛憲司希旨鍛成其
獄奏集惡逆坐當死詔下其議楊素等議請論如律時
滕王綸坐與相連帝不忍加誅除名遠徙邊郡天下亂
不知所終

河間王弘字辟惡文帝從祖弟也祖愛敬早卒父元孫
少孤隨母郭氏養於舅族及武元帝與周文建義關中
元孫時在鄴懼為齊人所誅因假外家姓為郭氏元孫

死齊為周滅弘始入關與文帝相見帝哀之為買田宅

弘性明悟有文武幹略數從征伐累遷開府儀同三司

文帝為丞相恒置左右委以腹心帝詣周趙王宅將及

於難弘時立於戶外以衛文帝尋加上開府賜爵永康

縣公及受禪拜大將軍進爵郡公尋贈其父柱國尚書

令河間郡公其年立弘為河間王拜右衛大將軍尋進

柱國以行軍元帥出靈州道征突厥大破之拜寧州總

管上柱國政尚清靜甚有恩惠遷蒲州刺史得以便宜

從事時河東多盜賊弘奏為盜者百餘人投之邊裔州境帖然號為良吏每晉王廣入朝弘輒領揚州總管及王歸藩弘復還蒲州在州十餘年風教大洽煬帝嗣位拜太子太保歲餘薨大業六年追封郇王子慶嗣慶傾曲善俟時變帝猜忌骨肉滕王綸等皆被廢放唯慶獲全累遷滎陽太守頗有政績及李密據洛口倉滎陽諸縣多應密慶勒兵拒守歲餘城中糧盡兵勢日蹙密遺慶書曰王之先世家住山東本姓郭氏乃非楊族婁敬

之於漢高殊非血盾呂布之於董卓良異天親芝焚蕙
嘆事不同此江都荒湫流宕忘歸骨肉崩離人神怨憤
舉烽火於驪山諸侯莫至浮膠船於漢水還日未期王
獨守孤城援絕千里糧糒支計僅有月餘弊卒之多財
盈數百有何恃賴欲相抗拒求枯魚於市肆即事非虛
因歸鴈以運糧竟知何日止恐禍生七首驟發蕭牆空
以七尺之軀懸當千金之購可為酸鼻者也幸能三思
自求多福于時江都敗問亦至慶得書遂降於密改姓

為郭氏密破歸東都又為楊氏越王侗不之責也及侗稱制拜宗正卿世充既僭偽號降爵郇國公復為郭氏世充以兄女妻之署滎州刺史及世充將敗慶欲將妻同歸長安其妻曰國家以妾奉箕帚於公者欲以申厚意結公心耳今父叔窮逼家國阽危而公不顧婚姻孤負付託自為全身之計非妾所望也妾若至長安公家一婢耳何用妾為願送還東都君之惠也慶不許其妻遂沐浴靚粧仰藥而死慶遂歸唐為宜州刺史郇國公

復姓楊氏其嫡母元太妃年老兩目失明世充斬之
義城公處綱文帝族父也生長北邊少習騎射在周以
軍功拜上儀同文帝受禪贈其父鍾葵柱國尚書令義
城縣公以處綱襲焉累遷右領軍將軍處綱雖無材藝
而性質直在官彊濟亦為當時所稱拜蒲州刺史吏民
悅之卒於秦州總管謚曰恭弟處樂官至洛州刺史漢
王諒反朝廷以為二心廢錮不齒

離石太守子崇武元帝族弟也父盆生贈荊州刺史子

崇少好學涉獵書記有風儀愛賢好士開皇初拜儀同
以車騎將軍恒典宿衛後為司門侍郎煬帝嗣位累遷
侯衛將軍坐事免未幾復檢校將軍事從帝幸汾陽宮
子崇知突厥必為寇屢請早還京師不納尋有鴈門之
圍及賊退帝怒之曰子崇怯懦妄有陳請驚動我衆心
不可居爪牙寄出為離石郡太守有能名自是突厥屢
寇邊塞胡賊劉六兒復擁衆劫掠郡境子崇表請兵鎮
遏帝復大怒令子崇行長城子崇行百餘里四面路絕

不得進而歸歲餘朔方梁師都馬邑劉武周等各作亂
郡中諸胡復反子崇惠之言欲朝集遂與腹心數百人
自孟門關將還京師遇道路隔絕退歸離石左右聞太
原兵起不復入城各叛去子崇惠收叛者父兄斬之後
數日義兵至城中應之城陷為讎家所殺

文帝四王

文帝五男皆文獻皇后所生長曰房陵王勇次煬帝次
秦孝王俊次庶人秀次庶人諒

房陵王勇小名覲地伐文帝長子也周世以武元帝軍功封博平縣侯及文帝輔政立為世子拜大將軍左司衛封長寧郡公出為維州總管東京少冢宰總統舊齊之地後徵還京師進上柱國大司馬領內史御正諸禁衛皆屬焉文帝受禪立為皇太子軍國政事及尚書死罪以下皆令勇參決帝以山東人多流冗遣使案驗又欲徙人北實邊塞勇上書諫以為戀土懷舊人之本情波迸流移蓋不獲已有齊之末主闇時昏周平東夏繼

以威虐人不堪命致有逃亡非厭家鄉樂為羈旅若假以數歲沐浴皇風逃竄之徒自然歸本雖北夷犯邊令所在嚴固何待遷配以致勞擾上覽而嘉之時晉王廣亦表言不可帝遂止是後時政不便多所損益帝每納之帝從容謂羣臣曰前代皇王溺於嬖幸廢立之所由生朕無姬侍五子同母可謂真兄弟也豈若前代多諸內寵庶孽忿爭為亡國之道邪勇頗好學解屬詞賦性寬仁和厚率意任情無矯飾之行劉臻明克讓姚察陸

爽並以文學為勇賓友勇嘗盛飾蜀鎧帝見而不悅恐
致奢侈之漸因誡之曰我聞天道無親惟德是與厯觀
前代帝王未有奢華而得長久汝當儲后若不上稱天
心下合人意何以承宗廟之重居兆民之上吾昔日衣
服各留一物時復翫之以自警戒又擬分賜汝兄弟恐
汝以今日皇太子之心忘昔日之事故令高頴賜汝我
舊所帶刀子一枚并菹醬一合汝昔作上士時所常食
如此若存憶前事應知我心其後經冬至百官朝勇勇

張樂受賀帝知之問朝臣曰近聞至節內外百官相率
朝東宮是何禮也太常少卿辛亶對曰於東宮是賀不
得言朝帝曰改節稱賀止可三數十人逐情各去何因
有司一時徵集太子法服設樂待之東宮如此殊乖禮
制於是下詔停斷自此恩寵始衰漸生疑阻時帝令選
東宮彊武入上臺宿衛高頴奏若盡取彊者恐東宮宿
衛太劣帝作色曰我有時行動宿衛須得雄毅太子毓
德東宮何須彊武始我商量恒於交番之日分向東宮

上下團伍不別豈非好事邪我熟見前代公不須仍踵
舊風蓋疑頽男尚勇女遽出此言以防之勇多內寵昭
訓雲氏尤嬖幸禮匹於嫡而妃元氏無寵嘗遇心疾二
日而薨獻皇后意有他故甚責望勇又自妃薨雲昭訓
專擅內政后彌不平頗遣人伺勇罪過晉王廣知之彌
自矯飾姬妾但備員數唯共蕭妃居處由是皇后薄勇
愈稱晉王德行後晉王來朝車馬侍從皆為儉素交接
朝臣禮極卑屈聲名籍甚冠於諸王臨還揚州入辭皇

后因進言曰方違顏色臣子之戀實結於心哽噎流涕

伏不能興皇后亦曰我又年老今者之別有切常離相對
獻欵王曰臣性識愚下常守平生昆弟之意不知何
罪失愛東宮恒蓄盛怒欲加屠陷每恐讒譖生於投杼
鳩毒遇於杯勺皇后忿然曰覲地伐漸不可耐我為娶
元家女望隆基業竟不聞相禮答專寵阿雲使有如許
豚犬前新婦本自無病忽爾暴亡當由遣人投藥以致
天逝事已如此我亦不能窮治何因復於汝處發如此

意我在尚爾我死後當魚肉汝等每思東宮竟無正嫡
至尊千秋萬歲後遣汝兄弟向阿雲兒前再拜問訊此
是幾許大痛苦邪晉王又拜嗚咽不能止后亦悲不自
勝晉王於是知皇后意移始構奪宗之計因引張衡定
策遣宇文述深交楊約令喻旨於越公素具言皇后此
語素瞿然曰但不知皇后果爾否必如所言吾亦何為
者數日素入侍宴微稱晉王孝悌恭儉有類至尊用此
揣皇后意后果泣曰公言是也我兒大孝順每聞至尊

及我遣內使到必迎於境首又其新婦亦大可憐我使
婢去常與同寢共食豈如覲地伐共阿雲對坐終日酣
宴昵近小人疑阻骨肉我所以益憐阿麼者常恐覲地
伐殺之素既知意因盛言太子不才皇后遂遺素金始
有廢立之意勇頗知其謀憂懼計無所出聞新豐人王
輔賢能占候召而問之輔賢曰白虹貫東宮門太白襲
月皇太子廢黜之象勇愈懼乃以銅鐵五兵造諸厭勝
又於後園作庶人村屋宇卑陋寢處其中布衣草褥冀

以當之帝知其不安在仁壽宮使楊素觀勇素至東宮
偃息未入勇束帶待之故久不進以激怒勇勇銜之形
於言色素還言勇怨望恐有他變願深防察帝聞素言
甚疑之皇后又遣人伺覘東宮纖介事皆聞奏因加媒
孽構成其罪帝惑於邪議遂疎忌之廼於玄武門達至
德門量置候人以伺動靜皆隨事奏聞又東宮宮衛之
侍官已上名籍悉令屬諸衛府有健兒者咸屏去之晉
王又令段達私於東宮幸臣姬威遺以財貨令取太子

消息密告楊素於是內外誼謗過失日聞段達脅姬威
曰東宮罪過主上皆已知之已奉密詔定當廢立君能
告之則大富貴威遂許諾開皇二十年九月壬子車駕
至自仁壽宮翌日御大興殿帝謂侍臣曰我新還京師
應開懷歡樂不知何意翻悵然愁苦吏部尚書牛弘奏
曰由臣等不稱職故令至尊憂勞帝既數聞讒譖疑朝
臣具委故有斯問冀聞太子之愆而弘對大乖本指帝
因作色謂東宮官屬曰仁壽宮去此不遠而令我每還

京師嚴備如入敵國我為患利不脫衣卧昨夜欲得近
廁故在後房恐有警急還移就前殿豈非爾輩欲壞我
家國邪於是執左庶子唐令則等數人付所司訊鞠令
楊素陳東宮事狀以告近臣素顯言之曰臣前奉勅向
京令皇太子檢校劉居士餘黨太子忿然作色肉戰淚
下云居士黨已盡遣我何處窮討爾作右僕射受委自
求何關我事又云昔舉大事萬一不成我遂先被誅戮
今作天子竟乃令我不如羣弟一事已上不得自由因

長歎回旋云我大覺身妨又云諸王皆得奴獨不與我
乃向西北奮首喃喃細語帝曰此兒不堪承嗣久矣皇
后常勸我廢之我以布素時生復是長子望其漸改隱
忍至今勇昔從南充州來語衛王曰阿孃不與我一好
婦女亦是可恨因指皇后侍兒曰皆我物此言幾許異
事其婦初亡我深疑使馬嗣明藥殺我嘗責之便懟曰
會當殺元孝矩此欲害我而遷怒耳初長寧誕育朕與
皇后共抱養之自懷彼此連遣來索且雲定興女在外

私合而生想此由來何必是其體盾昔晉太子取屠家女其兒即好屠割今儻非類便亂宗祏又劉金麟常諂呼定興作家翁定興愚人受之不疑我前解金麟者為此故也勇昔在宮引曹妙達共定興女同宴妙達在外云我今得勸妃酒我直以其諸子偏庶畏人不服故逆縱之以收天下望耳我雖德慙堯舜終不以萬姓付不肖子我常畏其加害如防大敵今欲廢之以安天下左衛大將軍元旻諫曰廢立大事天子無貳言詔旨若行

後悔無及讒言罔極唯陛下察之旻辭直爭彊聲色俱厲帝不答是時姬威又表告太子非法帝謂威曰太子事跡宜皆盡言威對曰皇太子由來共臣語唯意在驕奢欲得樊川以至散關總規為苑云昔漢武將起上林苑東方朔諫賜朔黃金百斤幾許可笑我實無金輒賜此等若有諫者正當斬之不過殺百許人自然永息前蘇孝慈解正衛率皇太子奮髯揚肘曰大丈夫當有一日終不忘之決當快意又宮內所須尚書多執法不與

便怒曰僕射已下五人會展三人脚使知慢我之禍又
於苑內築一小城四時作役不輒營起亭殿朝造夕改
每云至尊嗔我多側庶高緯陳叔寶豈是孽子乎嘗令
巫姥卜吉凶語臣云至尊忌在十八年此期促矣帝泣
然曰誰非父母生乃至於此我有舊使婦女令看東宮
奏云勿令廣平王至皇太子處東宮憎婦亦廣平王教
之元贊亦知其陰惡勸我於左藏東加置兩隊初平陳
後宮人好者悉配春坊如聞不知厭足於外更有求訪

朕近覽齊書見高歡縱其兒子不勝忿憤安可効尤於是勇及諸子皆被禁錮部分收其黨與楊素舞文鍛鍊以成其獄勇由是遂敗居數日有司承素意奏元旻身備宿衛常曲事於勇情存附託在仁壽宮裴弘將勇書於朝堂與旻題封云勿令人見帝曰朕在仁壽宮有纖小事東宮必知連於郵傳訝之甚久豈非此徒邪遣武士執旻及弘付法先是勇嘗於仁壽宮起居還道中見枯槐樹根幹蟠錯大且五六圍顧謂左右曰此何所用

之或對曰古槐利以取火于時衛士皆佩火燧勇令匠者造數千枚藏庫中欲以分給左右又藥藏局貯艾數斛至是有司搜得火燧及艾大以為怪以問姬威威言太子此意別有所在比令長寧王已下詣仁壽宮還每常急行一宿便至恒飼馬千匹云徑往守捉城門自然餓死素以威言詰勇勇不服曰竊聞公家有馬數萬匹勇忝備位太子有馬千匹乃是反乎素又發泄東宮服翫似加瑯飾者悉陳之於庭以示文武羣官為太子罪

帝曰前薄王世積家得婦女領巾狀似幡稍朕以為服
袂徧示百官欲以為戒今我兒乃自為之使將諸物示
勇以詰之皇后與帝迭遣使責問勇勇不服太史令袁
充進曰臣觀天文太子當廢久矣上曰元象久見矣羣
臣無敢言者於是使人召勇勇見使者驚曰得無殺我
邪帝戎服陳兵御武德殿集百官立於東面諸親立於
西面引勇及諸子列於殿庭命薛道衡宣詔廢勇及其
男女為王公主者並為庶人命道衡謂勇曰爾之罪惡

人神所棄欲求不廢其可得乎勇再拜而言曰臣合尸

之都市為將來監誠幸蒙哀憐得全性命言畢泣下沾襟既而舞蹈而去左右莫不憫嘿又下詔誅元昊唐令則等七人及所坐者數十人各誅戮有差乃移勇於內史省給五品料食立晉王廣為皇太子仍以勇付之復囚於東宮賜楊素物三千段元胄楊約並千段楊難敵五百段皆鞫勇之功賞也時文林郎楊孝政上書諫曰皇太子為小人所誤宜加訓誨不應廢黜上怒撻其胷

尋而貝州長史裴肅表稱庶人罪黜已久當克已自新
請封一小國帝知勇之黜也不允天下之情乃徵肅入
朝具陳廢立之意時勇自以廢非其罪頻請見上面申
冤屈而太子遏之不得奏聞勇於是升樹大叫聲聞於
上冀得引見楊素因奏言勇情志昏亂為鬼物所憑不
可復收上以為然卒不得見素誣陷經營以成其罪皆
如此帝寢疾於仁壽宮召皇太子入侍醫藥而皇太子
奸亂宮闈事聞於帝帝抵牀曰枉廢我兒因遣追勇呼

兵部尚書柳述黃門侍郎元巖為勅未及發而帝暴崩
太子祕不發喪遽收柳述元巖繫大理獄偽為高祖勅
賜庶人死追封房陵王不為立後勇有十男雲昭訓生
長寧王儼平原王裕安城王筠高良娣生安平王嶷襄
城王恪王良媛生高陽王該建安王韶成姬生潁川王
瑒後宮生孝實孝範初儼之誕也帝聞之曰此乃皇太
孫何乃生不得地雲定興奏曰天生龍種所以因雲而
出時人以為敏對六歲封長寧郡王勇敢亦坐廢儼上

表求宿衛辭情哀切帝覽之惻然楊素進曰伏願聖心
同於螫手不宜留意煬帝踐阼儼嘗從行遇鴆卒諸弟
分徙嶺外皆勅所在殺之

秦王俊字阿祗開皇元年立為秦王二年拜上柱國河
南道行臺尚書令洛州刺史時年十二加右衛大將軍
領關東兵三年遷秦州總管隴右諸州盡隸焉俊仁恕
慈愛崇敬佛道嘗請為沙門不許六年遷山南道行臺
尚書令伐陳之後為山南道行軍元帥督三十總管水

陸十餘萬屯漢口為上流節度尋授揚州總管四十四州諸軍事鎮廣陵轉并州總管二十四州諸軍事俊初頗有令聞文帝聞而大悅後漸奢侈違犯制度出錢求息帝遣按其事與相連坐者百餘人於是盛脩宮室窮極侈麗俊有巧思每親運斤斧為工巧之器飾以珠玉為妃作七寶罽毼重不可載以馬負之而行徵役無已置渾天儀測景表又為水殿香塗粉壁玉砌金階梁柱楣棟之間周以明鏡間以寶珠極瑩飾之美每與賓客

伎女絃歌於其上俊頗好內妃崔氏性妬甚不平之遂
於瓜中進毒俊由是遇疾徵還京師帝以俊奢縱免官
以王就第左武衛劉昇諫曰秦王非有他過但費官物
營廨舍而已臣謂可容帝曰法不可違昇固諫帝忿然
作色昇乃止楊素復進諫以秦王過不應至此帝曰我
是五兒之父非是兆人之父邪若如公意何不別制天
子兒律以周公為人尚誅管蔡我誠不及周公遠矣安
可廢法卒不許俊疾篤含銀銀色變以為遇蠱未能起

遣使奉表陳謝帝責以失德大都督皇甫統上表請復王官不許歲餘以疾篤復拜上柱國二十年六月薨於邸帝哭之數聲而止曰晉王前送一鹿我今作脯擬賜秦王今亡可置靈坐之前心已許之不可虧信帝及后往視見大蜘蛛及大蛭蝮從枕中出求之不見窮之知妃所為也俊所為侈麗物悉命焚之勅送終之具務從儉約以為後世法王府僚佐請立碑帝曰欲求名一卷史書足矣何用碑為若子孫不能保家徒與人作鎮石

耳妃崔氏以毒王故下詔廢絕賜死於其家子浩崔氏
所生以其母譴死遂不得立以秦國官為喪主俊長女
永豐公主年十三遭父憂哀慕盡禮免喪遂絕酒肉每
忌日輒流涕不食有開府王延者性忠厚領俊親信兵
十餘年後甚禮之及俊疾延恒在閤下衣不解帶俊薨
勺飲不入口者數日羸頓骨立帝聞而憫之賜以御藥
授驃騎將軍典宿衛俊葬日延號慟而絕帝嗟異之令
通事舍人弔祭詔葬延於俊墓側煬帝即位立浩為秦

王以奉孝王嗣封浩弟湛濟北侯後以浩為河陽都尉
楊玄感作逆之際左翊衛大將軍宇文述勒兵討之至
河陽脩啟於浩浩詣述營共相往復有司劾浩以諸侯
交通內臣竟坐廢免宇文文化及弒逆立浩為帝及敗於
黎陽北走魏縣自僭為帝因而害之湛驍果有膽烈大
業初為滎陽太守坐浩免後亦為化及所害

庶人秀開皇元年立為越王未幾徙封於蜀拜柱國益
州總管二十四州諸軍事二年進上柱國西南道行臺

尚書令本官如故歲餘而罷十二年入為內史令右領軍大將軍尋出鎮於蜀秀有膽氣容貌瓌偉美鬚髯多武藝甚為朝臣所憚帝每謂獻皇后曰秀必以惡終我在當無慮至兄弟必反兵部侍郎元衡使於蜀秀深結於衡以左右為請衡既還京師為秀請益左右帝不許大將軍劉瓛之討西爨帝令上開府楊武通將兵繼進秀使嬖人萬知光為武通行軍司馬帝以秀任非其人譴責之因謂羣臣曰壞我法者必在子孫譬如猛虎物

不能害反為毛間蟲所損食耳於是遂分秀所統秀漸
奢侈違犯制度車馬被服擬於天子及太子勇廢秀甚
不平皇太子恐秀終為後變陰令楊素求其罪狀而譖
之仁壽二年徵還京師帝見不與語明日使使切責之
秀謝罪皇太子及諸王流涕庭謝帝曰頃者秦王廢費
財物我以父道訓之今秀蠹害生靈當以君道繩之乃
下執法開府慶整諫曰庶人勇既廢秦王已薨陛下見
子無多何至如是蜀王性甚耿介今被責恐不自全帝

大怒欲斷其舌因謂羣臣曰當斬秀於市以謝百姓乃
令楊素蘇威牛弘柳述趙綽推之太子陰作偶人書帝
及漢王姓名縛手釘心令人埋之華山下令楊素發之
又云秀妄述圖讖并作檄文曰逆臣賊子專弄威柄陛
下唯守虛器一無所知中陳甲兵之盛云當指期問罪
置秀集中以聞帝曰天下寧有是邪乃廢為庶人幽之
內侍省不得與妻子相見令給獠婢二人驅使與秀連
坐者百餘人秀既幽逼憤懣不知所為乃上表陳已愆

請與其愛子瓜子相見并請賜一穴令骸骨有所帝乃下詔數其罪過凡有十事使臣下知之後竟聽與其子同處煬帝即位禁錮如初宇文化及之弑逆也欲立秀為帝羣議不許於是害之并其諸子

庶人諒字德章一名傑小名益錢開皇元年立為漢王十二年為雍州牧加上柱國右衛大將軍轉左衛大將軍十七年出為并州總管帝幸溫湯而送之自山以東至於滄海南拒黃河五十二州盡隸焉特許以便宜不

拘律令十八年起遼東之役以諒為行軍元帥至遼水
師遇疾疫不利而還十九年突厥犯塞以諒為行軍元
帥竟不臨戎文帝甚寵愛之諒自以居天下精兵處以
太子勇讒廢居常怏怏陰有異圖遂諷帝云突厥方彊
太原即為重鎮宜脩武備帝從之於是大發工役繕脩
器械貯納於并州招集亡命左右私人殆將數萬有王
頃者梁將王僧辯之子少儻好奇略為諒諮議參軍
蕭摩訶者陳氏舊將二人俱不得志每鬱鬱思亂皆為

諒親善及蜀王以罪廢諒愈不自安會文帝崩煬帝使

車騎屈突通以高祖璽書徵之先是高祖與諒密約若璽書徵汝敕字傍別加一點又與王麟符合則就徵及發書無驗諒知有變不赴遂發兵反總管司馬皇甫誕諫諒諒收繫之王類說諒曰王所部將吏家屬盡在關西若用此等即宜長驅深入直據京都所謂疾雷不及掩耳若但欲割據舊齊之地宜任東人諒不能專定乃兼用二策聲言楊素反將誅之總管府兵曹河東裴文

安說諒曰井陘以西是王掌握內山東士馬亦為我有
宜悉發之分遣羸兵屯守要路仍令隨方略地率其精
銳直入蒲津文安請為前鋒王以大軍繼後風行電擊
頓於灞上咸陽以東可指麾而定京師震懼兵不暇集
上下相疑羣情離駭我即陳兵號令誰敢不從旬月之
間事可定矣諒大悅於是遣所署大將軍余公理將兵
出太谷以趣河陽大將軍慕容良出滏口以趣黎陽大將
軍鄭建出井陘以略燕趙柱國喬鍾馥出鴈門署文安

為柱國與紇單貴王聃大將軍茹茹天保侯莫陳惠直指京師諒簡精銳數百騎載輿籬詐稱宮人還長安徑入蒲州城中豪傑亦有應之者文安等未至蒲津百餘里諒忽改圖令紇單貴斷河橋守蒲州而召文安文安至曰兵機詭速本欲出其不意王既不行文安又返使彼計成大事去矣諒不對於是從亂者十九州乃以王聃為蒲州刺史裴文安為晉州粹為絳州梁菩薩為潞州韋道正為韓州張伯英為澤州遣偽署大將軍常倫

進兵絳州倫遇晉州司法仲孝俊之子謂曰吾曉天文
遁甲今年起兵得晉地者王孝俊聞之曰皇太子常為
晉王故曰晉地非謂反徒也時潞州有官羊生羔二首
相背以為諒之咎徵煬帝遣楊素率騎五千襲王昺紇
單貴於蒲州素夜至河際收商賈船得數百艘置草其
中踐之無聲遂銜枚而濟遲明擊之單貴敗走昺以城
降素於是率步騎四萬趣太原諒使趙子開守高壁素
擊走之諒大懼自拒素於蒿澤屬天大雨諒欲旋師王

頽諫曰楊素懸軍士馬疲弊王以銳卒親戎擊之其勢必舉今見敵而還示人以怯阻戰士之心益西軍之氣願必勿還諒不從退守清原素進擊之諒與官軍戰死者萬八千人諒退保并州素進擊之諒窮蹙請降頽自殺百寮奏諒當死帝曰朕終鮮兄弟情不忍言欲屈法恕諒一死於是除名絕其屬籍竟以幽死所部吏民生死徙者二十餘萬家先是并州謠言一張紙兩張紙客量小兒作天子時偽署官告身皆一紙別授則二紙諒

聞謠言曰我幼時字阿客量與諒同音吾於皇家最小
以為應之子顥因而禁錮宇文化及弑逆之際遇害

煬帝三子

煬帝三男蕭皇后生元德太子昭齊王暕蕭貴嬪生趙
王果

元德太子昭煬帝長子也初文帝以開皇三年四月庚
午夢神自天而降云將生降帝家寤召納言蘇威以告
之及聞蕭妃在并州有娠迎置大興宮客省明年正月

戊辰而生昭養於宮中號大曹主三歲時於元武門弄石師子文帝與獻皇后至其所文帝適患腰痛舉手馮后昭因避去如是者再三文帝歎曰天生長者誰復教乎由是大奇之文帝嘗謂曰當為爾娶婦昭應聲而泣文帝問其故對曰漢王未昏時恒在至尊所一朝娶婦便即出外懼將遠離是以啼耳上嘆其有至性特鍾愛焉年十二立為河南王仁壽初徙為晉王拜內史令兼左衛大將軍轉雍州牧煬帝即位便幸洛陽宮留昭守

京師大業元年帝遣使者立為皇太子昭有武力能引
彊弩性謙冲言色恂恂未嘗忿怒其有深可嫌責者但
云大不是所膳不許多品帷席極於儉素臣吏有老父
母必親問其安否歲時皆有惠賜其仁惠如此明年朝
於洛陽後數月當還京師願得少留帝不許拜請無數
體素肥壯因致勞疾帝令巫者視之云房陵王為祟未
幾而薨時年二十三先是太史奏言楚分有喪於是改
封越公楊素於楚及昭薨日而素亦薨蓋隋楚同分也

詔內史侍郎虞世基為哀冊文帝深追悼之昭妃慈州刺史博陵崔弘昇女後秦王妃以蠱毒獲譴昭奏曰惡逆者乃新婦之姐請離之乃娶滑國公京兆韋壽女為妃昭有子三人韋妃生恭皇帝大劉良娣生燕王倓小劉良娣生越王侗倓字仁安性敏慧美儀容大業二年立為燕王煬帝於諸孫中特所鍾愛常置左右性好讀書尤重儒素造次所及有若成人良娣早終每忌日未嘗不流涕嗚咽帝由是益奇之宇文化及弑逆之際倓

覺變欲入奏恐露其事因與梁公蕭鉅千牛宇文肅等
穿芳林門側水竇入至元武門詭奏曰臣卒中惡命懸
俄頃請得面辭死無所恨冀得見帝為司宮者所過竟
不得聞俄而難作遇害時年十六侗字仁謹美儀容性
寬厚大業三年立為越王帝每巡幸侗常留守東都楊
玄感反與戶部尚書樊子蓋拒之事平朝於高陽拜高
陽太守俄以本官留守東都十三年帝幸江都復令侗
與金紫光祿大夫段達太尉卿元文都攝戶部尚書韋

津右武衛將軍皇甫無逸等總留臺事字文化及之弒
逆元文都等議共立侗為帝大赦改元曰皇泰諡煬帝
曰明廟號世祖尊元德太子為孝成皇帝廟號世宗尊
其母劉良娣為皇太后以段達為納言右翊衛大將軍
攝禮部尚書王世充為納言左翊衛大將軍攝吏部尚
書元文都為內史令左驍衛大將軍盧楚亦內史令皇
甫無逸為兵部尚書右武衛大將軍郭文懿為內史侍
郎趙長文為黃門侍郎各居樞要委以機務為金書鐵

奏藏之宮掖于時洛陽稱段達等為七貴未幾宇文文化及立秦王浩為天子來次彭城所經城邑多從逆黨侗懼遣使者蓋琮馬公政招懷李密密遂請降侗大悅禮其使甚厚即拜密為太尉魏國公令拒化及仍下書告播中外密見使者大悅北面拜伏臣禮甚恭遂東拒化及七貴頗不協陰有相圖之計未幾元文都盧楚郭文懿趙長文等俱為世充所殺皇甫無逸遁歸長安世充詣侗陳謝辭情哀苦侗以為至誠命之上殿世充被髮

為盟誓無貳志自是侗無所關預及世充破李密衆望
益歸之遂自為鄭王總百揆加九錫備法物侗不能禁
段達雲定興等十人入見侗曰天命不常鄭王功德甚
盛願陛下遵唐虞之際侗怒曰天下者高祖之天下東
都者世祖之東都若隋德未衰此言不可得而發必天
命有改亦何論於禪讓公等或先朝舊臣或勤王立節
忽發斯言朕亦何望神色凜然侍衛者莫不流汗既而
退朝對良娣而泣世充便使謂曰今海內未定宜得長

君待四方又安當復子明辟必若前盟義不違負侗不
得已遜位於世充遂被幽於含涼殿世充僭偽號封潞
國公月餘有宇文儒童裴仁基等謀誅世充復立侗事
洩並見害世充兄世惲因勸世充害侗以絕人望世充
遣其姪行本齋鳩詣侗曰願皇帝飲此酒侗知不免請
與母相見不許遂布席焚香禮佛咒曰從今已去願不
生帝王尊貴之家於是仰藥而不能時絕更以帛縊之
世充偽諡曰恭帝

齊王暕字世朏小字阿孩美容儀踈眉目少為文帝所
愛開皇中立為豫章王及長頗涉經史尤工騎射初為
內史令仁壽中拜揚州總管江淮以南諸軍事煬帝即
位進封齊王大業二年帝初入東都盛陳鹵簿暕為軍
導轉豫州牧俄而元德太子薨朝野注望咸以暕當為
嗣帝又勅吏部尚書牛弘妙選官屬公卿由是多進子
弟明年轉雍州牧尋徙河南尹開府儀同三司元德太
子左右二萬餘人悉隸於暕寵遇益隆自樂平公主及

諸戚屬競來致禮百官稱謁填咽道路陳頗驕恣昵近
小人所行多不法遣喬令則劉虔安裴該皇甫諶庫狄
仲錡陳智偉等采求聲色狗馬令則等因此放縱訪人
家有女者輒矯陳命呼之載入陳宅因緣藏隱恣行淫
穢而後遣之仲錡智偉二人詣隴西搆灸諸胡責其名
馬得數匹以進於陳陳令還主仲錡等詐言王賜將歸
家陳不之知也又樂平公主嘗奏言柳氏女美者帝未
有答久之主復以柳氏進陳陳納之後帝問主柳氏女

所在主曰在齊王所帝不悅陳於東都營第大門無故
崩聽事枳中折識者以為不祥後從帝幸榆林陳督後
軍步騎五萬恒與帝相去數十里而舍會帝於汾陽宮
大獵詔陳以千騎入圍陳大獲麋鹿以獻而帝未有所
得怒從官從官皆言為陳左右所遏獸不得前帝於是
發怒求陳罪失時制縣令無故不得出境有伊闕令皇
甫詡幸於陳陳違禁將之汾陽宮又京兆人達奚通有
妾王氏善歌貴遊宴聚多或要致於是展轉亦出入王

家御史韋德裕希旨劾陳帝令甲士千餘大索陳第因窮治其事陳妃韋氏尚書冲之女也早卒陳遂與妃姊元氏婦通產一女外人皆不知陰引喬令則於第內酣宴令則稱慶脫陳帽以為歡樂召相工令徧視後庭相工指妃姊曰此產子者當為皇后貴不可言時國無儲副陳自謂次當得立又以元德太子有三子內常不安陰挾左道為厭勝之事至是事皆發帝大怒斬令則等數人妃姊賜死陳府僚佐皆斥之邊遠時趙王果猶在

孩孺帝謂侍臣曰朕唯有暎一子不然者當肆諸市朝以明國憲暎恩寵自是日衰雖為京尹不復關預時政帝恒令虎賁郎將一人監其府事暎有微失輒令奏之帝亦慮暎生變所給左右皆以老弱備員而已暎每懷危懼心不自安又帝在江都宮元會暎具法服將入朝無故有血從裳中而下又坐齋中見羣鼠數十至前而死視皆無頭暎甚惡之俄而化及作亂兵將犯蹕帝聞之顧謂蕭后曰得非阿孩邪其見蹕忌如此化及復令


人捕陳陳時尚卧未起賊進陳驚曰是何人莫有報者
陳猶謂帝令捕之曰詔使且緩兒不負國家賊曳至街
斬之及其二子亦遇害陳竟不知殺者為誰時年三十
四有遺腹子愍與蕭后同入突厥處羅可汗號為隋王
中國人沒入北蕃者悉配之以為部落以定襄城處之
及突厥滅乃獲之貞觀中位至尚衣奉御永徽初卒

趙王果小字季子年七歲以大業九年封趙王尋授光
祿大夫歷河南尹行江都太守果聰明美容儀帝有所

製詞賦果多能誦之性至孝嘗見帝風動不進膳果亦
終日不食又蕭后嘗灸果先請試炷后不許之果泣請
曰后所服藥皆蒙嘗之今灸願聽嘗炷悲咽不已后為
由是尤鍾愛後遇化及反果在帝側號慟不已裴
通使斬之帝前而血崩御服時年十二

通志卷八十五下

財團法人
佛陀教育基金會
譯爭空



總校官庶吉士臣侍 朝

校對官庶吉士臣陳文樞

謄錄監生臣沈元錡